



Fidoyilik —
Vatanga xizmat demak!

2023-yil 23-fevral, payshanba,
22 (23.743)-son

**KUN
HIKMATI**

Qo'lida kasbi yoki
hunari, yuragida
shijoati, vujudida
g'ururi yo'q kishining
ko'zlari ham, qo'llari
ham muruvvatga
qarab turadi

1913-yil aprel oyidan chiqq boshlagan



www.zarnews.uz



https://www.facebook.com/zarnews.uz



@zarnews_uz



https://twitter.com/zarnews_uz

Xalq deputatlari viloyat Kengashining QARORI

Jamoat ehtiyojlari uchun yer uchastkasini olib qo'yish bo'yicha taqdimot materiallarini ko'rib chiqish va yer uchastkasining olib qo'yilishiga ruxsat berish to'g'risida

O'zbekiston Respublikasining "Yer uchastkalarini kompensatsiya evaziga jamoat ehtiyojlari uchun olib qo'yish tartib-taomillari to'g'risida"gi Qonuniga hamda O'zbekiston Respublikasi Vazirlar Mahkamasining 2019-yil 16-noyabrda qaratilgan 911-sonli qarori bilan tasdiqlangan "Yer uchastkalarini olib qo'yilish va olib qo'yilayotgan yer uchastkasida joylashgan ko'chmas mulk ob'yektlari mulkdorlariga kompensatsiya berish tartibi to'g'risida"gi Nizomga hamda O'zbekiston Respublikasi Prezidentining Samarqand viloyatiga tashriflari davomida o'tkazilgan majlis bayonlari, Vazirlar Mahkamasining 2019-yil 17-maydagi 415-sonli qarori, Samarqand shahar hokimligining 2023-yil 9-fevraldagi 03-01/16, Kattaqo'rg'on shahar hokimligining 2023-yil 31-yanvardagi 01-01/27-sonli xatlariga asosan turarjoy mulkdorlaridan yer uchastkasini jamoat ehtiyojlari uchun olib qo'yish yuzasidan tayyorlangan taqdimot materiallarini ko'rib chiqib, "Mahalliy davlat hokimiyati to'g'risida"gi O'zbekiston Respublikasi Qonunining 6- va 24-moddalariga asosan xalq deputatlari Samarqand viloyati Kengashining oltinchi chaqiriq saxon birinchi sessiyasi **QAROR QILADI:**

1. Samarqand shahrining Gagarin ko'chasi qayta qurish, muhandislik-kommunikatsiya tarmoqlari holatini yaxshilash, tunnel va yo'l o'tkazgichlar qurish ishlarini amalga oshirish munosabati bilan hududdagi 88 ta (34 779,59 kv.metr) hamda Kattaqo'rg'on shahar "Ziyolilar" mahalla fuqarolar yig'ini hududida joylashgan "Sarmozor" masjidi binosini qayta qurish munosabati bilan hududda joylashgan 3 ta (106,65 kv.metr) ob'yektlar mulkdorlaridan yer uchastkasini davlat va jamoat ehtiyojlari uchun olib qo'yish yuzasidan tayyorlangan taqdimot materiallari ma'qullansin.

2. Viloyat hokimi o'rinbosarlari (F.Abilov, A.Shukurov), Samarqand shahar hokimligi (F.Umarov) va Kattaqo'rg'on shahar hokimligi (G.Alimova) Samarqand shahrining Gagarin ko'chasini qayta qurish, muhandislik-kommunikatsiya tarmoqlari holatini yaxshilash, tunnel va yo'l o'tkazgichlar qurish ishlarini amalga oshirish hamda Kattaqo'rg'on shahar "Ziyolilar" mahalla fuqarolar yig'ini hududida joylashgan "Sarmozor" masjidi binosini qayta qurish munosabati bilan ilovaga muvofiq, mazkur hududlarda joylashgan mulk egalari bilan O'zbekiston Respublikasi Vazirlar Mahkamasining 2019-yil 16-noyabrda qaratilgan 911-sonli qarori bilan tasdiqlangan "Yer uchastkalarini olib qo'yilish va olib qo'yilayotgan yer uchastkasida joylashgan ko'chmas mulk ob'yektlari mulkdorlariga kompensatsiya berish tartibi to'g'risida"gi Nizom talablari asosida olib qo'yishga rozilik berilsin.

3. Viloyat hokimi o'rinbosarlari (F.Abilov, A.Shukurov), viloyat hokimligi Yer uchastka-

lari olib qo'yilishi va kompensatsiya berish ishlarini muvofiqashtirish shu'ba (N.Qudratov), Samarqand (F.Umarov) va Kattaqo'rg'on shahar hokimliklari (G.Alimova)ga;

O'zbekiston Respublikasining "Yer uchastkalarini kompensatsiya evaziga jamoat ehtiyojlari uchun olib qo'yish tartib-taomillari to'g'risida"gi Qonuniga hamda O'zbekiston Respublikasi Vazirlar Mahkamasining 2019-yil 16-noyabrda qaratilgan 911-sonli qarori bilan tasdiqlangan "Yer uchastkalarini olib qo'yilish va olib qo'yilayotgan yer uchastkasida joylashgan ko'chmas mulk ob'yektlari mulkdorlariga kompensatsiya berish tartibi to'g'risida"gi Nizom talablariga qat'iy rioya etish;

4. Viloyat hokimligi Yer uchastkalarini olib qo'yilishi va kompensatsiya berish ishlarini muvofiqashtirish shu'ba (N.Qudratov) ushbu qarorni hokimlikning rasmiy saytida, shuningdek, ommaviy axborot vositalarida e'lon qilinishini ta'minlash.

5. Mazkur qarorning ijrosini nazorat qilish xalq deputatlari viloyat Kengashining Sanoat, transport, qurilish, kommunal soha va aholiga xizmat ko'rsatish masalalari bo'yicha doimiy komissiyasi (O'.Saidmurodov) va viloyat hokimining o'rinbosari (A.Shukurov) zimmasiga yuklansin.

Kengash raisi

2023-yil 17-fevral

E.TURDIMOV

VI-81-15-7-0-K/23

(Qaror ilovasi bilan gazetamizning Zarnews.uz veb-sayti orqali tanishishingiz mumkin)

Jomboy tumanidagi "SOF EXPO SAMARKAND" ko'rgazmalar markazida "AGROPRO EXPO-2023" (agrotexnologiyalar, qishloq xo'jaligi texnikalari va uskunalar, qishloq xo'jaligiga xizmat ko'rsatish tarmoqlari, chorvachilik, parrandachilik, standartlashtirish va sertifikatlash kabi sohalarda) II xalqaro ko'rgazma yarmarkasi o'tkazildi.



Unda Markaziy Osiyo, MDH davlatlari, Yevropa va Osiyo mamlakatlari, jumladan, Germaniya, Niderlandiya, Rossiya, Turkiya, Eron, Janubiy Koreya kabi qishloq xo'jaligi rivojlangan davlatlar hamda mahalliy ishlab chiqaruvchilarning yetakchi kompaniyalari o'z mahsulotlari bilan ishtirok etdi.

Ko'rgazmada 150 dan ortiq kompaniya va korxonalar 20 mingdan ortiq mahsulot va xizmatlarini taklif etdi.

- Korxonamiz 2018-yilda turkiyalik ta'rischilarning sarmoyasi asosida ish boshlagan va asosan ekin maydonlariga suv tejavchi texnologiyalar o'rnatish bilan shug'ullanamiz, - deydi "Agro Boss IRRIGATION" mas'uliyati cheklangan jamiyati bo'lim mudiri Shamsiddin Qurbonov. - O'tgan vaqt davomida korxonamiz tomonidan 4 ming gektarga yaqin maydon-da suv tejavchi texnologiyalar o'rnatildi. Samarqandning iqlim sharoiti va yerning holati, samaradorligidan kelib chiqib, asosan tomchilatib va yomg'irli sug'orish texnologiyalariga talab yuqori bo'lmoqda. 2021 yilda Samarqand shahrida suv tejavchi texnologiya ishlab chiqaruvchi korxonaga ham tashkil qildik.

Ko'rgazmada mevali va manzarali ko'chatlar, urug'lar, qishloq xo'jalik korxonalaridan ishlab chiqarilgan mahsulotlar, shuningdek, xorijdan keltirilgan yirik va mayda shoxli chorva mollari, quyonchilik, baliqchilik, parrandachilik xo'jaliklari uchun uskunalar, ozuqa mahsulotlari namoyish etildi. Tijorat banklari va boshqa moliya tashkilotlari tomonidan xizmatlar taqdimotlari o'tkazildi.

O'simliklarni zararkunanda va kasalliklardan saqlovchi vositalar paviloni ham ishtirokchilarni e'tiborsiz qoldirmadi.

- Asosan xorijdan har xil hasharot, zararkunanda va kasalliklarga qarshi kimyoviy vositalar, hosildorligi yuqori bo'lgan dukkakli ekinlar urug'larini keltiramiz, - deydi "Sam Agro Sentr" mas'uliyati cheklangan jamiyati

"AGROPRO EXPO-2023"

G'ARB VA SHARQNING
DEHQONCHILIKDAGI
YUTUQLARI
KO'RGAZMASI



yetakchi agronomi Tolib Yaxshiboyev. - Endilikda Germaniyaning yetakchi korxonalaridan biri bilan o'simlikning bargidan oziqlantiruvchi vositalar-ni yurtimizda qo'llash bo'yicha kelishuv olib boryapmiz. O'tgan yili shu ko'rgazma doirasida 10 milliard so'mlikka yaqin 4 ta shartnoma imzolagandik. Bu gal esa birinchi kun Qashqadaryo viloyati Shahrisabz tumanidagi "Oqsaroy" klaster korxonasi bilan 7 ming gektar paxta maydoniga xizmat ko'rsatish uchun 3 milliard so'mlik shartnoma tuzdik.

Ko'rgazmada qo'shni viloyatlarning qishloq xo'jalik mahsulotlari ishlab chiqaruvchilari, eksportyor va importyorlari, dehqon-fermerlari, klaster korxonalarini xodimlari ham qatnashdi. Bu yerda ishtirokchilar uchun o'zaro muloqot qilish, taqdimotlar o'tkazish uchun imkoniyatlar yaratilgan.

Ko'rgazma doirasida soha mas'ullari va mutaxassislarining agrar soha vakillari bilan uchrashuvi ham o'tkazilib, sohadagi yutuq va kamchiliklar muhokama qilindi.

- Agrar sohada innovatsiya nima uchun kerak, deb o'yilgan dehqon xato qiladi, - deydi viloyat hokimining birinchi o'rinbosari v.v.b. F.Abilov. - Bugun qishloq xo'jaligida butunlay yangi texnologiya, yangicha uslublar qo'llanilmoqda. Jahonning yetakchi davlatlarida ham yerga munosabat tamomila o'zgaragan. Har qancha yerdan unumli foydalanish, tejankor yo'llar bilan yuqori hosildorlikka erishish - zamon talabi. Bu ko'rgazmada ham zamonaviy va tejankor uskunalar namoyish etilmoqda. Ular yordamida bir nechta jarayonni bir vaqtda bajarish mumkin. Birgina piyoz ekishda biz odatiy usulda gektariga 16 kilogramgacha urug' sarflaymiz. Zamonaviy seyalka yordamida gektariga 4 kilogramm urug' ekish mumkin.

O'tgan yilgi ko'rgazmada 100 dan ortiq korxonaga mingga yaqin mahsulot va xizmatlari bilan qatnashgan va 200 milliard so'mlik 100 ga yaqin shartnoma imzolangan. Bu yilgi yarmarkada 800 milliard so'mlik hamkorlik shartnomalari imzolaniishi kutilmoqda.

Ko'rgazmada iqtisodiyot sohasini rivojlantirish, investitsiyalar va tashqi savdo siyosatini amalga oshirish masalalari bo'yicha Prezident maslahatchisi o'rinbosari Sh.G'aniyev, viloyat hokimi E.Turdimov, sohaga mas'ul vazirliklar vakillari ishtirok etdi.

**O'ktam XUDOYBERDIYEV,
Alisher ISROILOV (surat).**

1-MARTDAN SAMARQAND AEROPORTIDAN YANGI AVIAPARVOZLAR AMALGA OSHIRILADI

Quvaytning "Jazeera Airways" aviakompaniyasi 2023-yilning 1-martidan Al-Quvayt va Samarqand shaharlari o'rtasida to'g'ri muntazam qatnovlarni yo'lga qo'yadi.



"Airbus A320" samolyotlarida amalga oshirilishi rejalashtirilgan parvozlar haftada ikki marta - chorshanba va yakshanba kunlariga mo'ljallangan.

Joriy yilning 1-martidan Samarqanddan Nukus, Mo'ynoq, Termiz shaharlariga ham muntazam qatnovlar boshlanadi.

Eslatib o'tamiz, 2022-yil 1-oktabrdan Samarqand xalqaro aeroportida "Ochiq osmon" rejimi joriy etilgan.

O'zbekiston Respublikasi Prezidentining virtual va Samarqand viloyatida faoliyat ko'rsatayotgan Xalq qabulxonalariga 2022-yilda jismoniy va yuridik shaxslardan 147 ming 650 ta murojaat kelib tushgan. Bu murojaatlarning 15354 tasi yuridik va jismoniy shaxslar tomonidan bevosita Xalq qabulxonalariga berilgan.

- Murojaatlarning o'z vaqtida ko'rib chiqilishini ta'minlash, qanoatlantirish darajasini oshirish yuzasidan zarur choralar ko'rilishi natijasida muammoli masalalarning aksariyati hokimliklar va mas'ul idoralar tomonidan hal etildi, - deydi viloyat Xalq qabulxonasi mudiri Mamatjon Turdiyev. - Shu bilan birga, murojaatlar bilan ishlashda kamchiliklarga yo'l qo'yish holatlari ham kuzatildi va bu haqda tegishli tashkilotlarga taqdimnoma, takliflar hamda hududiy Kengashlarga axborotlar kiritildi. Natijada murojaatlarga e'tiborsiz qaragan mas'ul shaxslarga nisbatan 346 ta ogohlantirish, 90 ta hayfsan, 25 ta lavozimdan ozod etish, 4 ta oylik ish haqidin jarimaga tortish va 36 ta ma'muriy javobgarlik choralar ko'ridi. Sayyor qabullar aholi bilan ochiq va samarali muloqot usuliga aylanmoqda. O'tgan yil viloyat-

36 nafar mas'ul shaxs

murojaatlarga e'tiborsizligi uchun ma'muriy javobgarlikka tortildi



da sektor rahbarlari tomonidan joylarda 3817 ta sayyor qabul o'tkazilib, 36 ming 684 nafar fuqaroning 38 mingdan ortiq murojaati qabul qilindi.

Bu murojaatlarning 24600 dan ortig'i, ya'ni 64 foizi ijobiy hal etildi.

Misol uchun, viloyat hokimi, birinchi sektor

rahbari E.Turdimov tomonidan Past Darg'om tumanida o'tkazilgan sayyor qabul natijasida, aholi murojaatlari asosida "yo'l xaritasi" ishlab chiqilib, mahallalarda 361 dona beton ustun o'rnatildi. 2,5 kilometr suv tarmog'i tortilib, bitta suv qudug'i qazildi. Olti mahalladagi suv inshootlari ta'mirlandi.

Bu kabi ishlar Payariq, Kattaqo'rg'on, Narpay, Nurobod, Ishtixon, Bulung'ur va boshqa tumanlarda ham olib borildi. Ijtimoiy-iqtisodiy jihatdan og'ir hudud hisoblangan 83 mahallaning 633 kilometr ichki yo'llariga tosh-shag'al yotqizildi, 278 kilometr ichimlik suvi tarmog'i, 292 dona ichimlik suvi inshootlari ta'mirlandi. Aholini uzluksiz elektr energiyasi bilan ta'minlash maqsadida 9012 dona ustunlar yangisiga almashirildi va eskilari ta'mirlandi, 1373 kilometr elektr uzatish tarmoqlari, 1285 dona transformator ta'mirlandi. Bu ishlar natijasida 40 ta mahalla og'ir hudud toifasidan chiqarildi.

Viloyat hokimi tomonidan Payariq tumanining eng chekka G'allakor mahallasida o'tkazilgan sayyor qabul davomida tushgan murojaatlar asosida hududdagi 894 dona beton ustun, 11 dona transformator, 20 dona tungi yoritish chiroqlari o'rnatildi, 1,8 kilometr ichki yo'l asfalt qilindi, 8 kilometr tuproq yo'lga shag'al to'kildi, 156 dona yangi maishiy gaz ballonlar berildi, suv inshooti ta'mirlandi hamda maktab o'quvchilari uchun avtobus tashkil qilindi.

"Inson qadri uchun"

Ayni paytda bunday bunyodkorlik, obodonlashtirish ishlari boshqa mahallalarda ham amalga oshirilmoqda.

Ma'lumotlarga ko'ra, viloyatdagi ijtimoiy himoyaga muhtoj oilalarni qo'llab-quvvatlash maqsadida o'tgan yil Xalq qabulxonalarini va hokimliklar, sog'liqni saqlash, ijtimoiy xizmatlar agentligi va homiylik yordami bilan 953 ta nogironlik aravachasi va xodunok, 287 juft qo'ltiqtaqoy, 324 ta hassa va 359 ta eshitish moslamasi berilgan. 2000 nafarga yaqin fuqaro tibbiyot muassasalarida bepul davolangan. 7100 nafardan ortiq fuqaroga dori-darmon, 1500 nafarga yaqin pensioner va nogironlarga sanatoriylarga yo'llanma ajratildi.

O'tgan yil Xalq qabulxonalarida ilk bor mahalliy Kengashlar deputatlari tomonidan ham sayyor qabullar o'tkazildi. Mazkur qabullar davomida yuridik va jismoniy shaxslardan 1134 ta murojaat kelib tushgan bo'lib, 867 tasi, ya'ni 76 foizi ijobiy hal etildi.

Albatta, o'tkazilayotgan bu kabi tadbirlar fuqarolarning davlat organlariga va o'zlari saylagan deputatlarga ishonchini oshirib, joylardagi muammolarga o'z vaqtida yechim topishga, muhimi, aholining roziligiga xizmat qilmoqda.

G'.HASANOV.

O'n uch yil davomida (1973-yildan 1986-yilgacha) "Lenin yo'li" (hozirgi "Zarafshon" gazetasi)ga muharrirlik qilgan Ahmadjon Muxtorov hayot bo'lganida bugun 87 yoshga to'lardi.

MUHARRIRLAR ARBOBI



Chapdan: A.Muxtorov, M.Najmiddinov, A.Ibodullayev, N.G'oyibov.

ni sizga ham aytgim keldi.

Samarqand adabiy muhitida muhri bor Ahmadjon aka Toshkentga, Markazqo'm gazetasiga mo'min-qobil dastyor bo'lish uchungina kelmaydi. Komfirqaning muz qotgan matbuotini eritish, xalqqa yaqinlashtirish chakana gapmi? Menimcha, "jurnalist" so'zining o'zagi o'zbekchasiga "jur'at" bo'lsa kerak.

1991-yilning ilk kuni O'zbekiston ma'rifiy hayotiga o'ziga xos yangilik olib kiradi. Oliy Kengash muassisligida "Xalq so'zi" gazetasi chiqarib boshlaydi (Gazetaning nishona soni 1990-yil 29-oktabrda bosmadan chiqqan). Cho'lponning "Xalq dengizdir, xalq to'lqindir, xalq kuchidir!" satrini shior qilgan yangi nashr

nomini kirill va nasta'liqda yozib, gazetxonlarga yanada tushunarli bo'lishi uchun yil, oy, kuni milodiy, hijriy qamariy va hijriy shamsiyda ham ko'rsatib o'tgan edi.

1989-1991-yillarni o'zbek jurnalistikasining, jumladan, matbuotining oltin davri, desak mubolag'a bo'lmaydi. "Yosh leninchi", "O'zbekiston adabiyoti va san'ati" gazetalarini, "Yoshlik", "Yosh kuch", "Mushtum", "Fan va turmush" jurnallari yuz minglab nusxada bosilar, matbuot tom ma'noda haqiqat minbari edi. Ana o'sha nashrlar qatoriga "Xalq so'zi" gazetasi ham kelib qo'shiladi. "Qovun-qovundan rang oladi", deganlaridek, yangi nashr safdoshlaridan ortda qolmaslikka, teppa-teng

qadam tashlashga intildi. Gazeta nishona soni bilan xalq tiliga tushib, o'quvchilari ko'paygandan-ko'payadi. Bu muvaffaqiyat o'sha vaqtda Habib Temir, Anvar Jo'raboyev, Abdunabi Boyqo'ziyev, Nabijon Sobir, O'rinboy Usmon, Jo'ra Sa'dulla, Muhtarama Ulug', Habibulla Olimjon, Tojiddin Razzoq, Ismat Xudoyor, Tohir Doli o'g'li, Esirgap Boli kabi ijodkorlar zahmati evaziga kelgan edi.

Xalq orasida "Do'sting kimligini aytasang, men sening kimligingni aytaman", degan naql yuradi. Ahmadjon aka atrofiga xuddi o'zi kabi qalamkashlarni yiqqanida mazkur hikmatli gapni tasdiqlashni o'ylab ham ko'rmagan. Bunday uyushuv qalb ehtiyoji, ruh, maslak va g'oya talabidan kelib chiqqan shubhasiz.

Soyasi bor odam shunday bo'lar ekan-da! Nomi zikr etilganlarning ko'pchiligi milliy matbuotimiz sahnasida atoqli bo'ldi.

"Biz "Zarafshon"danmiz" kitobida taniqli muharrir Ahmadjon Meliboyev "Ahmadjon Muxtorov tinim bilmay, yeng shimarib ishlaydigan, tahrir qalami bir zum to'xtamaydigan muharrirlardan edi. Bunday muharrirlarni futbolda o'yinchi-trenerga qiyoslashadi", deb yozadi. Gazeta taxlamlarini varaqlab, yuqorida-gi fikr naqadar to'g'ri ekaniga iqror bo'ldim. Rasmiy nashr rahbari xohlama-xohlama turli katta-kichik majlis-muhokamalarda qatnashishi shart. Fikr va ruhning egovi bo'lgan bunday dahmazalardan, qolaversa, tahriyatning ming bitta tashkiliy-moliyaviy masalalaridan ortib maqolalar bitish...

Rostini aytinganda, bu maqolalar o'zini ko'rsatib qo'yish yoki qo'lning qichuvini qondirish uchun yozilmagan. Ahmadjon aka imzosini arzon sotadigan ijodkor emas edi.

Sanab chiqdim. Gohida Ahmadjon G'ulomzoda, ba'zan Ahmad Muxtor, aksariyat hollarda Ahmadjon Muxtorov deya imzo chekan jurnalist olti oy ichida "Urush bo'lmaydi deb, urush bo'ldi-ya", "Tomdan tarasha tushgandek", "Har kim tor doirada o'ylamasdan, umumiy manfaatni ko'zlasin", "O'n imzo ostiga imzo", "Birovdan kam, birovdan ziyod", Anatoliy Kovalyov bilan hamkorlikda "Mevali daraxtga tosh otadilar", Habib Temir bilan hamkorlikda "Bahor qaytib keladi", "U aytmagan so'z", "Sinsa ko'ngil shishasi" kabi yigirmaga yaqin maqola e'lon qilgan.

Olim TOSHBOYEV.

Yonimizdagi odamlar

Samarqand azaldan ziyolilar, olimlarga beshik bo'lgan, ularni kamolga yetkazgan zamin sanaladi. Samarqand davlat universiteti professori, faylasuf olim Jo'raboy Yaxshilikov ana shunday ziyoli insonlardan biri.

Faylasuf olim



Jo'raboy Yaxshilikov 1953-yil 25-fevralda Bulung'ur tumani Oqtapa qishlog'ida tug'ilgan. Tumdandagi 15-o'rta maktabda tahsil olgan, Toshkent davlat universitetining falsafa fakultetida o'qidi. 1975-yilda o'qishni bitirib,

Samarqand davlat universitetining falsafa kafedrasiga ishga keldi.

Yosh o'qituvchi talabalarga falsafa ilmini o'rgatish bilan birga ilmiy salohiyatini ham oshirib bordi. 1978-1982-yillarda kafedraning sirtqi aspiranturasida o'qib, professor O.Bozorov rahbarligida ilmiy izlanishlar olib bordi. 1982-yilda nomzodlik dissertatsiyasini himoya qildi.

J.Yaxshilikov 1987-yilda doktorlik dissertatsiyasi ustida ishlash uchun Moskva davlat universitetining falsafa fakultetiga ilmiy safarga jo'natildi. 1990-1991-yillarda SamDuning oliy maktabga tayyorlash fakulteti dekani va kafedra dotsenti sifatida faoliyat ko'rsatdi. J.Yaxshilikov 1993-yilda doktorlik dissertatsiyasini himoya qildi. 1999-yilda professor ilmiy unvonini oldi.

U SamDU rektorining ma'naviy-ma'rifiy ishlar bo'yicha birinchi prorektori va falsafa kafedrasini mudiri lavozimida mehnat qildi. 1996-yilda tashkil etilgan falsafa maktabidan o'nlab fan nomzodi va fan doktorlari yetishib chiqdi. Domla yosh olimlarga, aspirant va talabalarga doim samimiyat bilan yordam berib keldi.

Professor J.Yaxshilikov 16 yil universitetning falsafa kafedrasini mudiri bo'lish bilan birga, ijtimoiy-siyosiy fanlar fakulteti dekani, universitet axborotnomasi jurnali bosh muharriri o'rinbosari, Oliy attestatsiya komissiyasi eksperti a'zosi sifatida ham faoliyat olib bordi. 2018-yildan shu kafedrada professor lavozimida ishlab kelmoqda.

Hozirgi kunda olim 5 ta jurnal tahrir hay'ati hamda universitet ixtisoslashgan kengashi a'zosi. U 30 dan ortiq xalqaro va respublika ilmiy-konferensiyalarida o'z ma'ruzalari bilan ishtirok etgan. To'rt nafar fan doktori, 30 nafar fan nomzodi tayyorladi. "Ulug'bekning tabiiy-ilmiy merosi", "Temuriylar ma'naviyati", "Jadidchilik va Behbudiy" kabi 12 ta monografiya, 3 ta darslik, 8 ta risola, 3 ta o'quv qo'llanma, 350 dan ortiq ilmiy maqolalar chop ettirgan.

Xalq ta'limi a'lochisi, birinchi darajali mehnat faxriysi, professor J.Yaxshilikov bugun o'zining 70 yoshini qarshilamoqda. Faylasuf-o'limni qutlug' yosh bilan tabriklab, ilmiy faoliyatida muvaffaqiyatlar tilaymiz.

O.G'AYBULLAYEV,
Samarqand davlat chek tillar instituti birinchi prorektori, professor.
A.SAMADOV,
Samarqand davlat universiteti kafedra mudiri, professor.

OIV infeksiyasi pandemiyasi bugun dunyo miqyosida dolzarb muammo hisoblanadi. Chunki bu infeksiya uni yuqtirgan insonlar sog'lig'iga jiddiy xavf tug'dirishi bilan birga jamiyat rivojiga ham salbiy ta'sir qiladi.

Shaxsi sir saqlangan holda tekshiruv o'tkazish mumkin



OIV infeksiyasi - odamning immunitet tanqisligi virusi keltirib chiqaradigan surunkali yuqumli kasallik hisoblanib, virus bemor odam organizmida butun hayoti davomida saqlanib qoladi. Infeksiya dastlab yashirin tarzda kechishi, bu davr bir necha oydan 5-10 yilgacha va undan ham ortiqroq davom etishi mumkin. Kasallikning yashirin davrida virusni yuqtirib olgan shaxs ko'rinishidan sog'lom bo'lib, unda xastalikning hech qanday belgilari kuzatilmaydi. Kasallikning shu davri ancha xavfli hisoblanib, infeksiyani yuqtirib olgan shaxslar o'zlarini bilmagan holda uni boshqalarga yuqtirib yurishlari mumkin. Virus organizmida ko'payib, asta-sekin immun tizimini mutlaqo izdan chiqaradi va oqibatda OITS kasalligi rivojlanadi.

OIV virusi immun tizimini yillar davomida izdan chiqarishi oqibatida yuzaga keladigan dastlabki belgilar quyidagilardir: sababsiz uzoq davom etuvchi yo'tal, odamning qisqa vaqt ichida keskin ozib ketishi, tana haroratining uzoq vaqt sababsiz ko'tarilishi va ich ketishi (diareya), og'iz bo'shlig'i hamda turli a'zolarining yallig'lanish belgilari, xavfli o'smalarning rivojlanishi namoyon bo'la boshlaydi. Bemorlar OIVning besovata ta'siridan emas, balki qo'shimcha kasalliklar asoratlari tufayli hayotdan ko'z yumadilar.

Bugungi kunda OIV bilan kasallangan shaxsning kasallikdan sog'aymasligining asosiy sababi virusdan butunlay xoli qiluvchi dori vositalarining hozircha mavjud emasligidir. Bunga sabab virusning o'ta o'zgaruvchanligidir. Dunyoning ko'plab davlatlari-

radorligi yuqori bo'ladi. Hozirgi kunda viloyat OITSga qarshi kurash markazi va hududiy davolash profilaktika muassasalari qoshida "Ishonch" xonalari faoliyat ko'rsatib kelmoqda. O'zida OIV infeksiyasi bor yoki yo'qligini aniqlamoqchi bo'lgan xar bir shaxs ushbu "Ishonch" xonalarga yoki ambulatoriya poliklinika muassasalariga murojaat qilib, shaxsi sir saqlangan holda pasport ma'lumotlarisiz bepul ravishda tahlil topshirib, javobini olishi mumkin.

Z.UMRZOQOV,
Samarqand davlat tibbiyot universiteti epidemiyologiya kafedrasini mudiri,
R.ERMANOV,
kafedra assistenti.

REKLAMA, E'OLONLAR, BILDIRISHLAR / Gazetamiz haftada uch marta - seshanba, payshanba va shanba kunlari chop etiladi / Gazetada chop etilayotgan reklama va e'lonlar tekzor, samarali va hamyonbop / MUROJAAT UCHUN TELEFON: 66-233-91-56



Murod HAMROQULOV

Samarqand kooperativ instituti (hozirgi Samarqand iqtisodiyot va servis instituti)ning iqtisodiyot fakul'tetini tamomlagan.

U dastlabki faoliyatini oliy o'quv yurtida tahsil davridayoq boshlagan. Ya'ni, 1969-yilda Samarqand viloyati yoshlar qo'mitasi qoshidagi "SPUTNIK" xalqaro yoshlar turizmi byurosida mehnat qildi.

Tashabbuskor va fidoyiligi sabab, xizmat pillapoyalardan yuqorilab bordi. Samarqand shahar Siyob tumani yoshlar qo'mitasida rahbarlik vazifalarida ishladi.

1981-1993-yillarda Farhod shaharchasi ijroiya qo'mitasi va xalq deputatlari Kengashi raisi bo'ldi. Shaharchaning o'bod bo'lishi, odamlar turmushini farovon qilishda samarali mehnat qildi. Uning faolligi, o'zi va qo'l ostidagilarga nisbatan talabchanligi tufayli Farhod shaharcha kengashi ikki marotaba O'zbekis-

ton Respublikasida eng ilg'or hudud, deb topildi.

M.Hamroqulov 1993-2004-yillarda Markaziy bank Samarqand viloyati boshqarmasida valyuta iqtisodiyot bo'limi rahbari, keyinchalik Amir Temur xalqaro jamg'armasi direktori, "SINO" zavodida tashqi savdo tijorat departamenti boshlig'i vazifalarida ishladi.

M.Hamroqulov qaysi sohada ishlamasin, o'z vazifasiga mas'uliyat bilan yondashib, katta yutuqlarga erishgan, soha rivojiga munosib hissa qo'shgan, tajribasi, bilimi, kasbiga sadoqati tufayli ko'plab shogirdlar chiqargan inson edi.

Murod aka uni tanigan-bilganlar yodida namunalni xulqi va ezgu amallari bilan xotirlanadigan ibratli insonlardan edi.

SAMARQAND SHAHRI CHILUSTUN MAHALLASI FAOLLARI.

DA'VOLAR BO'LSA...

Samarqand shahrida xususiy amaliyot bilan shug'ullanuvchi notarius Jo'rayev Kamoliddin Muhiddinovich notarial idorasida marhum Rashidov Alisher Maxmudovichga (2010-yil 1-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Jo'rayev Kamoliddin Muhiddinovich notarial idorasiga murojaat etishlarini so'raymiz.

Manzil: Samarqand shahri O'zbekiston ko'chasi, 35-uy.

Payariq tumanida xususiy amaliyot bilan shug'ullanuvchi notarius Muhammadiyev Farhod Jo'raqulov notarial idorasida marhum Xakimov Abror Akramovichga (2022-yil 31-martda vafot etgan) tegishli mol-mulk uchun meros ishi ochilgan. Shu munosabat bilan merosxo'rlarning Muhammadiyev Farhod Jo'raqulov notarial idorasiga murojaat etishlarini so'raymiz.

Manzil: Payariq tumani Chelak shaharchasi, Istiqlol ko'chasi, 73-uy.

Samarqand tumanida xususiy amaliyot bilan shug'ullanuvchi notarius Davronov Mahmud Hasan o'g'li notarial idorasida marhum Axrorov Mashraf Xamrakulovichga (2021-yil 8-noyabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Davronov Mahmud

Hasan o'g'li notarial idorasiga murojaat etishlarini so'raymiz.

Manzil: Samarqand tumani Oqmachit mahallasi.

Jomboy tumanida xususiy amaliyot bilan shug'ullanuvchi notarius Qodirov Ulug'bek Tolibovich notarial idorasida marhum Mirzayev Axmatga (2004-yil 4-yanvarda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Qodirov Ulug'bek Tolibovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Jomboy tumanida xususiy amaliyot bilan shug'ullanuvchi notarius Mamatqulov Otobek Bolbekovich notarial idorasida marhum Xakimova Ra'no Gadayevnaga (2021-yil 1-iyunda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Mamatqulov Otobek Bolbekovich notarial idorasiga murojaat etishlarini so'raymiz.

Manzil: Jomboy tumani Saroy ko'chasi, 15-uy.

Samarqand shahrida xususiy amaliyot bilan shug'ullanuvchi notarius Aliyeva Lola Zoirovna notarial idorasida marhum Xadiyeva Mexri Issakovnaga (2013-yil 24-oktabrda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Aliyeva Lola Zoirovna notarial

idorasiga murojaat etishlarini so'raymiz.

Manzil: Samarqand shahri Mirzo Ulug'bek ko'chasi, 80-uy.

Samarqand shahrida xususiy amaliyot bilan shug'ullanuvchi notarius Ismoilova Shahlo Bahriloyevna notarial idorasida marhum Sodiqov Sharifga (2010-yil 25-martda vafot etgan) tegishli mol-mulk uchun meros ishi ochilmoqda. Shu munosabat bilan merosxo'rlarning Ismoilova Shahlo Bahriloyevna notarial idorasiga murojaat etishlarini so'raymiz.

Manzil: Samarqand shahri Abdurahmon Jomiy ko'chasi, 17-uy.

BEKOR QILINADI
Samarqand tumanidagi "SULTONAPOSSHOO 777" mas'uliyati cheklangan jamiyatining (STIR: 308783594) dumaloq muhri va burchak tamg'asi yo'qolganligi sababli bekor qilinadi.

Bulung'ur tumanidagi "BULUNGUR FRUITS" mas'uliyati cheklangan jamiyatining (STIR: 309114887) dumaloq muhri va burchak tamg'asi yo'qolganligi sababli bekor qilinadi.

Qo'shrabot tumanidagi "QOSHYAG'OCH TRADI" mas'uliyati cheklangan jamiyatining (STIR: 308607907) dumaloq muhri va burchak tamg'asi yo'qolganligi sababli bekor qilinadi.

